

Kasa ku Mama

Ta un echu ku tantu hende ta papia bunita tokante famia ma no ta pone nan mes palabranan na praktika. Talbes a bira tempu pa deshasí di e famia por kompleto i inventá un otro modelo!

Mi ke propone un plan ku ta harmonisá mas mihó ku nos práktika: Pèrmití kada pareha kasá haña 1 yu hòMBER so. Promé ku e yu ta hasi 20 aña, e tata mester divorsiá e mama i buska un otro yufrou. Anto e yu hòMBER ta kasa ku su mes mama.

No spanta! Mi “surgerensia” simpelmente ta fasilitá loke nos ya kaba ta hasi!

Mi plan ta fasilitá e tata ku talbes ta bezig kòrtando orea di su kasá. E tata por buska un yùfrou mas atraktivo i mas hóben. E plan aki tambe ta fasilitá e mama. E mama a lidia ku e yu pa tantu aña, ta stim’è, i no ke pa e bandoná kas.

Mi plan sigur ta fasilitá e yu hòMBER. E ta stima su mama i ta konsider’è e ser mas kerí den mundu. Asta ora e tin su esposa, e tòg ta tuma konseho serka su mama, ta kome na kas di su mama, ta duna sèn na su mama, ta mustra apresio pa su mama, i asta ta drumi na kas di su mama ora e ta rabiá ku su esposa.

Mi plan lo benefisiá tantísimo esposa ku ta sinti **bandoná, ignorá, usá**. Nan ta haña poko amor, apresio, i kariño serka nan kasá. E esposo tin mas atenshon pa su mama ku e tin pa su esposa. E señora apenas por haña sèn na drechi pa sòru pa e famia, pasobra e mener egoísta ke sa ku ta **su sèn**. Ma e mesun esposo no ta lubidá di duna su mama sèn. **Klaramente e esposo tin muchu mas amor, apresio, i atenshon pa su mama ku e tin pa su esposa!** Pues, si bo ta stima bo mama tantu mas ku bo esposa, pakiko no hasié ofisial...pakiko no kasa ku bo mama?

E hòMBER ke sa ku e tin un señora pa prepará su kuminda, pa laba su paña, pa mantené su kas limpi, pa pone su yunan riba mundu i kria su yunan, i pa tene relashon seksual kuné ora ta su deseo...ma esei ta tur! E esposa tin nada di bisa! Tantu bal pa e hòMBER tin esposa! Frankamente bisá, un krèsh, kriá, i prostituta por yena tur su deseonan!

Naturalmente mi proposishon ta totalmente absurdo. Ma... **esei no ta loke nos ta hasi den praktika?**

Nos ta tan konvensé ku ta asina mes kos mester biba ku nos no por komprendé loke Palabra di Dios ta bisa. **Nos ta tan siegá pa nos kultura ku nos no ta skucha Skritura!**

Beibel ta papia bon kla: “...*un hòMBER lo bandoná su tata i su mama i lo uni ku su esposa.*” (Génesis 2:24). E teksto aki ta duna instrukshon sumamente importante pa e esposo:

1. Ora bo kasa, bo tin ku bandoná bo mayornan! Sin duda bo apresio pa nan ta sigui. Ma segun Beibel, **niun hende—ni bo mama—ta mas importante ku bo esposa!** Siendo kasá, bo mester hala mara ku bo esposa. Pa hasi esei, bo tin ku “bandoná” bo tata i mama den tur sintido: mental, emoshonal, spiritual, finansiero, èts. Sigur no biba den mesun kas—ni asta mesun kurá—ku bo mayornan.

2. Ora bo kasa, bo tin ku uni ku bo esposa! Bo mester invertí tempu pa siña konosé bo esposa den tur sintido. Abo ku bo esposa ta bira 1 solo entidad. Bo no ta un hende soltero mas. **Bandoná tur pensamentu egoísta!** Awor no ta “mi” sèn mas; ta “nos” sèn. Awor boso mester traha tempu pa komuniká ku otro regularmente. Awor bo ta keda kas huntu ku bo esposa na lugá di sali tur anochi ku bo amigunan. Awor ora boso tin klèsh (i kua matrimonio no tin klèsh?), boso ta hasi bon ku otro i ta sigui padilanti.

Si bo no ta despuesto pa bandoná bo mama, mihó no kasa! Bo relashon pa ku bo mama mester kambia por kompleto ora bo ta kasa. Sigur bo ta sigui stim’è. **Ma no pèrmití bo amor pa bo mama tuma lugá di bo amor pa bo esposa.** Si esei ta e kaso, talbes mihó bo a kasa ku bo mama.